

Atham woThitto tholeccuo Atham woThitto lon loIeccuo ammakka oluanna pokurrot Lon lonothon

Atham enni wapul pothothilettat poleccuo oluanna akkokurrot othakka itti aul iocokothē lon loIeccuo na'ran ia kwonat ikkun ie're'rapuruk iot lon nnan lo-porot. Kwokurrot a'ramacak kurekkurek iaine ul ioc-cokkot lon loIeccuo. Kwa'rettot nakin ia'ramacak wen itti okin thapa'rine lon ilokithak cik len ana ittarot kin akin o'rungkot ilon loKapik, antoka manna itti okin thaik thakkiettat thiak (Ku'rathal 2-3). Atham appik ncik wonu lon loIuanna ila Kapik kerenthok ithathantako lopu'ran poKapik ana thrik itha kwimmat. Ithathantako enthi appik, Kapik kittinok itti kokat kua ka tat nolon ilokithak ilaik nocapu ncik appik ana tat akka oMiccie athalkot lon ilokithak akwakkmakat ul appik i'rat lon lung. Ana Kapik kapa're capu enci cik ana kakkot capu icie na ul ionekkethe cikit naak ana ook ikkoik tothun thupuththuput.

Lon ilaik iatham

1. Lon lonothon (1.1–8)
2. Lon lonothon ilerettanok ana na'ramacak inothilan-thet ul iocokothē lon loIeccuo (1.9–3.22)
4. Atham io'remethettat ionemittathe ngnga'ra ie're'rapuruk (4.1–8.1)
4. Lipil ile're'rapuruk (8.2–11.19)
5. Papu ipokithak ipungkot pre ana a'rupu worikira we'ra (12.1–13.18)
6. Lon ilerettanet oluanna inthe ilaik kurekkurek (14.1–15.8)

7. Maththak ime're'rapuruk mothua ka thoKapik (16.1–21)
8. Thokittako thoPapilon ana thalkot papu ipokithak ipungkot pre ana ul wokarra wothernte lon loKapik ana pul pothopulut (17.1–20.10)
9. Thakkma ithacothot (20.11–15)
10. Tothi'rot irie ana capu icie ana Urucclim iie (21.1–22.5)

Oluanna peret atham enni

¹ Thitto lon ncik thoIeccuo itha Kapik kokenerok nan itti akwittine ul ncik ioccoothe lon loKapik lon ilaik lathokaik noma'ri motte imanhan. Kwokenet lon len nthothinhet pul ipaik parekinok oLuanna u'rupa wothothilettat woKapik wung ² ana oLuanna perekathe lon appik ila kwimmat nolon ila Kapik kothiothe ana nolon ila oleccuo oMicce pi'ret ana okkot. ³ Okkwi ipakkakkaro lon elli ilerettat mpul ipernte lon loKapik kwethietta, ana okkwion ithocckithe mono onekket nocikit ilokurrakot nthethietta, akka ca'ri cakko naphthut.

Thomicco

⁴ Elli laat naLuanna ana laine ul ioccoothe lon loIeccuo na'ran ie're'rapuruk noththok pAccia. Lon len li'ret itti thoporot ana thomicco thaik thainenon noKapik iakaik ana ikokat cik ana ikaik kao, ana nokanang ike're'rapuruk tokit koprrrok pung poili, ⁵ ana naleccuo oMiccie ook iperet lon ila kwimmat okorronno ocukko nal'rek, ana ook ponothon ipurokot nti ithio ana Ili wonili nonocapu.

Lon elli laine okkwi ipongotheron ana okkwi ipelikkot ton nti ilon ilokithak lonnon nnguccük nung. ⁶ Kwothikkiet ton thongili nung ana ul wonoppa

toKapik arekine Kapik kung ana oththan ipa thrik oine ana pu'ran thupuththuput. Amin.

⁷ Nantokatha, kwei panthan nnuththe,

ana kit appik kimmak, ana manna ul ierok ngkathuk ana ul wonocapu appik woo ana ipo thiak. Amin.

⁸ Ili Kapik wi'ret itti, “Oun Alppa ana Omeka,* okkwi ipaik, ana ipokat cik ana okkwi ipaik panthan, ook ipakan-nalkakot.”

Opilin pungkwot ukul wopul iponyi

⁹ Oun oluanna opang pon ana oron thulukku ithocokot thiak ana ingili ana ithocokot cikit thonnon ilon loleccuo, mpokat nocarkan corirok irapangka noka'ran koPaththamoc nti ilon loKapik ana ilimmakot ngkit loleccuo. ¹⁰ Noca'ri cotha'rane Ili nga'rama ana Kanang koKapik kokat naun anocikat po're cittan ere pothipil thoccul kin, ¹¹ apo're pen i'rekat itti, “Okurrothe iatham lon ila ngkwaik pakathacce athinthet mungkut ime're'rapuruk moul iocokothe lon loleccuo. Othinthet kin noka'ran kApuccuc ana noka'ran koCcimirna ana noka'ran koPerkkamuc ana noka'ran koThiaththira ana noka'ran koCcarthic ana noka'ran koPilathelppia ana noka'ran koLathukkia.”

¹² Anoprttakat itti anakatha po're ipokat cik aperenin. Manakka mpoprttakat cik, animmakat o'ren na amu'ru imonu ngaak iacco amikkoik me're'rapuruk imokkattathe nothaap, ¹³ ana itho'rkut tho'ren ie're'rapuruk na amu'ru imonu ngaak iacco ikkoik pul p'rek pokat cik “Pungkot

1:6 1.6 Thoppot thapat 19.6; 1 Poththuruc 2.9 1:7 1.7 Thanial 7.13; Maththa 24.30; 1 Thocculunukkia 4.17 * 1:8 1.8 Alppa ana Omeka: Alppa pace'r'ipil conomun ana omeka pace'r'ipil icacotho. Me'r'ipil amume'ra mokarru koKrik. Okin thakene thokaik thoKapik thupuththuput ana itti ook akkakkma capu ncik appik. 1:8 1.8 Iccaia 44.6

ukul wopul iponyi” kwokat pakot kret kukwit ko'rumothe tacok ana ku'rat kokkattathe nothaap topere. ¹⁴ Ca cung cokat cipuk ippuk ere pa'ra ana ki't kung kokat ere lu're lolik. ¹⁵ Tacok tung tokat arollio ere paponte ipoiththa ana po're pung pokat ere po're pongike. ¹⁶ Kwonat mothot me're'rapuruk thokkun wothothari ana ki'rittang ikukwit koppot nti ithon thung korrerriettathe. Toca tung tokat arollio ere k'ran kocingki amma cella nuththe nan.

¹⁷ Manacka mpimmarok anapat iracok tung ere mpiot. Akwonekkekat ukun wung wothothari naun akwi'rekat itti, “Kirrnni ipo n're. Oun poNothon ana Ipacothot. ¹⁸ Oun Ipaik thupuththuput, mpokat piot anaruk inenni mpaik thupuththuput ana oun akkonu pu'ran ikkun pothio ana pothothir'in.

¹⁹ Okurri lon ila ngkwimmat ana ila ngkwaik pakathacce ana ilathokaik noma'ri imanhan. ²⁰ Kumitta ikorukot ncik kolon lomothot ime're'rapuruk ima ngkwimmathe thokkun win wothothari ana lo'ren na amu'ru imonu ngaak iacco ikkoik iokkattathe nothaap ie're'rapuruk laik itti, mothot ime're'rapuruk mau'rupa wothothilettat woKapik womungkut moul iocckothe lon loIeccuo. O'ren ianekkettat ngaak nan iacco mmu'ru ngonu itti mungkut moul iocckothe lon loIeccuo ie're'rapuruk.”

2

Lon elli laine ul iocckothe lon loIeccuo noka'ran kApuccuc

¹ “Laine u'rupa wothothilettat woKapik iaik wakatha lon locungkut coul iocckothe lon loIeccuo noka'ran kApuccuc.

Lon elli laat nakkwi iponu mothot me're'rapuruk ikkun wothothari, akwonyaro itho'rkit tho'ren na amu'ru ime're'rapuruk imonu ngaak iacco ikkoik mothaap. ² Mpina ngre ngon appik ana ngre ngon ionthomat ana thocokot cikit ithokinya thon. Mpina itti onon thakinnikkoik nnul iokithak puccuk ana onon thennekket okkwion ithi're ngkarra itti okin ul wothothilettat woIeccuo anaruk okin thakannoka ana onon thaththiot itti lon len lokat lamoloko. ³ Onon thocokothe thiak kicce nti ilon lin anon okorronno apo ka ntit. ⁴ Ana icci mponu lon l'rek lotte lampongothe itti mpa'retto nanon ngngin, itti onon thakannoka thongothin ana nthakannongarot ammakka onon thokat ncinomun. ⁵ Nokwarttikot lon ilopa'ret non cik nti ikathar ikoporot, nopa'rine lon cik ilokithak annokkot lon iloporot ilanon thokat annokkettet ncinomun. Amma onon thakannopa'rineik ana mpainenon ana mpapa're o'ren cik na amu'ru imonu ngaak iacco ikkoik. ⁶ Anaruk onon thonu elli lanon thokkothe loporot, onon th'rat lon loNikkolawin ilakin thokat akin okkot ana mp'rat lon len cakuruk.

⁷ Okkwi iponu unu akwocokot lon ila Kanang erene ul iocokothe lon loIeccuo. Ana okkwi ipalkot lon ilokithak mpakorronok akwo'rko nopira pothikkoik ipaik itharak thoKapik.”

Lon elli laine ul iocokothe lon loIeccuo noka'ran koCcimirna

⁸ “Okurrinet u'rupa wothothilettat woKapik iaik wakatha lon locungkut coul iocokothe lon loIeccuo noka'ran koCcimirna.

Lon elli lokkwi poNothon ana ipocothothe, okkwi ipiot ana uroko attang. ⁹ Mpina nothiak ithanon thaik nan ana ella a'rupu cik anaruk onon thaa'rthan,

mpina k'ret koul iere itti okin ul woIouth anaruk okin thakannoka ul woIouth okin then thoul wonomuththun ma'rama mopul pothopulut. ¹⁰ Nokorronno opellene lon ilanon thaik thathoccokot thiak ngngin. Mpi'ret non itti pul pothopulut panekket opilingon ikorrkkor apennekkenon ana onon thakkiettatt thiak ma'ri attul. No'rungkot ithoccokot lon nomikitt manna nthantoka itti onon thille ana mpethet non thikkoik thothupuththuput.

¹¹ Okkwi iponu unu akwocckot lon ila Kanang erene cungkut coul iocckothe lon loIeccuo, okkwi ipalkothe lon ilokithak kwa'rettat nti ithio ithe'ra.”

Lon elli laine ul iocckothe lon loIeccuo noka'ran koPerkkamuc

¹² “Laine u'rupa wothehilettat woKapik iaik wakatha lon locungkut coul iocckothe lon loIeccuo noka'ran koPerkkamuc.

Lon elli laat nakkwi iponu ki'rittang ikukwit ana korrerre. ¹³ Mpina nanon thaik pul pothopulut ponu prrok poili nan. Anaruk onon tho'rumot nok'ran kin. Onon thakannoprtto thoccokot lon nomikitt thon cik naun, ana manna kannan noma'ri ima Anththipac, okkwi ipokat po'rumot nolon lin ana okkwi ipokkuttathe noka'ran kon na pul pothopulut paik.

¹⁴ Anaruk mponu lon lotte lampongothe itti mpa'retto nanon ngngin, onon thouu ul cingang iongothe thongkene thoPalaam okkwi ipongkenet oPalak itti kwipot ul woIccereil ilon ilokithak ana itti okin tho'rko thu'rit ana a'rupu iokeccettanthe a'rupu worikkilan cik ana a'ro nul nuthuk. ¹⁵ Ammakka menik onon thouu ul iongothe thongkene thoNikkolawin. ¹⁶ Nopa'rine lon ilokithak cik akka amma mpaat nanon

ana mpathatto iakin ngk'rittang ikukwit ikanthan nti ithon thin.

¹⁷ Okkwi iponu unu akwocikot ila Kanang erene ul iocokothe lon loleccuo. Ana okkwi ipalkothe lon ilokithak mpethok thu'rit ithocot k'ran itti manna ithokat thorukot ncik. Mpethok pothok cakuruk ipipuk ngk'ran kokurrakot nan kie, kinako mpul pen ipocot tulluk.”

Lon elli laine ul iocokothe lon loleccuo noka'ran koThiaththira

¹⁸ “Laine u'rupa wothothilettat woKapik iaik wakatha lon locungkut coul iocokothe lon loleccuo noka'ran koThiaththira:

Lon elli lokkul woKapik ionu kit kungkot lu're lalik ana ionu tacok tonthomat ere paponte ipoiththa. ¹⁹ Mpina lon lon ana thongat thon ana thocokot lon nomikit thon ana thocokot mikit ilon thon ana inenni onon thaik thakkot ngre ngoppot nore ianon thokkothe noma'ri monothon.

²⁰ Anaruk mponu lon l'rek ampongothe itti mpa'retto nanon nngin, onon thocokothe lon lopul ipopari ipocot k'ran itti oIcapil okkwi ipere ngarra itti ook pul pothernte lon loKapik. Nthongkene thung, kwopa'ret ul cik iarekinin woppot ammakot kathar koul iongothe tha'ro nul nuthuk ana o'rko thu'rit thorikkillan. ²¹ Mpethok ma'ri akwopa'rine lon lung cik lotha'ro nul nuthuk anaruk kw'rat. ²² Ittina mparrethok na'rangkal wothocokot thiak ana mpakkiet okkwion ithailet okin aththut thiak kannan. Anaruk amma okin akkopa'rinet lon len cik ana mpakannokkot kin lon l'rek. ²³ Mpangwo nyukul nyung. Ittina mungkut mouli iocokothe lon loleccuo mina itti oun okkwi ipakwantot mikit

moul ana nyathe're nyen ana mpakkenon thuluk thuluk ammakka ngre ianon thorekot. ²⁴ Ittina mpi'ret non th'rek ithaik noka'ran koThiaththira ana onon ithakannocokot lon nomikit olcapil ana okorronno ina lon lopul pothopulut ilamu'ruttakot ncik mpakannonemot lon l'rek nanon. ²⁵ Anaruk nocokot lon ilanon thouu puccuk anakkakat.

²⁶ Okkwi ipalkothe lon ilokithak len ana o'rungkwot nan okkot lon ila mpongothe puccuk mono ocothat, mpethok ngili ikkun ngoul woppot.

²⁷ 'Kwakkma kin ncu'rang coili copaponte, kwacukkwarot kin cik ere merok moummuk.' Ammakka mpoccot ngili nangappa. ²⁸ Ana mpethok pul pen thapa thothothuput thorrot. ²⁹ Okkwi iponu unu akwocokot lon ila Kanang erene cungkut coul iocokothe lon loIeccuo."

3

Lon elli laine ul iocokothe lon loIeccuo noka'ran koCcarthic

¹ "Laine u'rupa wothehiletat woKapik iaik wakatha lon locungkut coul iocokothe lon loIeccuo noka'ran koCcarthic:

Lon elli lokkwi iponu kanang koKapik ike're'rapuruk ana mothot ime're'rapuruk. Mpina ngre ngon ianon thaik thakkot, lon ila ul eret non ngngin lakene itti onon thaik ngkit thapat anaruk onon thillet. ² Nuroko, nopo'rie ngre than ngoul iocokothe lon loIeccuo iaik ngintat cik, akka mpaththiot itti onon thakan-nokkot ngre ncik appik ammakka Kapik kin kongothe. ³ Nokwarttikot, thongkene ithanon thongkenettat ana kathar ikanon thocokothe ngngin, nocokot kiththik

ana opa'rine lon len cik ilokithak. Anaruk amma onon thakanno'rumoik ana mpanthan ere pul pothu'ran ana onon thakinnina itti mpaik panthan noca'ri cia. ⁴ Anaruk okin thotte nti ianon noka'ran koCcarthic thakannokkot lon lokithak. Okin thamakothin, akin thakot eret wipuk, akka okin thekkot nan itti okin thako. ⁵ Okkwi ipalkothe lon ilokithak kwako kret kipuk. Mpakannopa're k'ran kung cik nti iatham wothikkoik, ana mpakorronno ocukkwo nok'ran kung tokit kongappa pin ana tokit kou'rupa wothothilettat woKapik. ⁶ Okkwi iponu unu, akwoccikot lon ila Kanang erene ul ioccoke the lon loIeccuo.”

Lon elli laine ul ioccoke the lon loIeccuo noka'ran koPi-lathelppia

⁷ “Laine u'rupa wothothilettat woKapik iaik wakatha lon locungkut coul ioccoke the lon loIeccuo noka'ran koPi-lathelppia:

Lon elli lokkwi ipupure ana ipaik icat, ana okkwi iponu pu'ran poThauth ikkun. Amma kwanyothe kathat ana pul pella ipulukkwo ana amma kulukkwothe kathat ana pul pella panyot. ⁸ Mpina ngre ngon, mpanyinthe non kathat cik tokit kon kapul pella pulukkwo. Akka mpina itti onon thou pu'ran potte ana icci onon tho'rumot nolon lin ana okorronno ocukkwo nok'ran kin. ⁹ Ana okkwion ithammakot pul ponocuththun copul pothopulut ana ithapri itti okin ul woIouth ana okin thannoka anaruk okin thou karra, mpakorronno kin akin athapot iracok ton ana akin ina itti mpongothenon. ¹⁰ Ana inakka onon tho'rumot nolon lin ilonthomat nthocokot cikit ilon, mpangwot non noca'ri icaik canthan nocapu appik acathennekke okkwion ithaik thikkoik nocapu appik.

¹¹ Mpakko napuththut paik panthan, noccokot lon ila nthonu kiththik othakka itti apul ella ipanekot non thokketta thon. ¹² Okkwi ipalkothe lon ilokithak ana mpathikkiek cillang conoppa toKapik kin ana kwokonnoththe nan. Mpakurro k'ran koKapik nakin ana k'ran koka'ran koKapik kin, Uruccelim iie iaat ntothi'rot noKapik kin, ana mpakurro k'ran kin ikie nakin. ¹³ Okkwi iponu unu akwocikot lon ila Kanang erene ul iocckothe lon loIeccuo.”

Lon elli laine ul iocckothe lon loIeccuo noka'ran ko-Lathukkia

¹⁴ “Laine u'rupa wothe'lettat woKapik iaik wakatha lon locungkut coul iocckothe lon loIeccuo noka'ran ko-Lathukkia:

Lon elli lolon itti, ‘Amin’ okkwi ipo'rumot no'ron ana okkwi ipimmat lon ngkit icat ana okkwi ipaili wa'rupu nocapu appik ia Kapik koku'ret ncik. ¹⁵ Mpina ngre ngon ianon thaik thakkot, onon thakannoka thippa ana manna nthakannoka thirruk, laakat loporot itti onon thaakat thirruk alla thippa. ¹⁶ Ana inakka onon thaik itho'rkut, thakannoka thirruk ana manna thippa mpaik pathothukkwot non cik nti ithon thin. ¹⁷ Ngkwi're itti, ‘Mpapa'rthan ana mponu a'rupu appik ia mpomonat ana mpakannangkot pap'rek.’ Anaruk ngkwomma itti ngkwokithak utha noka ana ngkwapiak ana ngkwella a'rupu cik ana ngkwi'rimathe ana ngkwella eret noka. ¹⁸ Mpongothe itti mpi'ret non itti onon thakerothin thaap enthi ithok'rettat nthik athinako itti thathaap icat othakka itti annothakka a'rthan, ana annako eret ipuk anno'rumot munthut mon imokithak, ana o'roko laka ikut othakka itti annimmaik.

¹⁹ Mpa'retto nakkwion itha mpongothe ana ocimitto kin akin omakot lon iloporot. Ittina occothe kit no'ron apa'ranthet lon ilokithak cik. ²⁰ Mpei cene paik pa-co'ro anokkwo kathat koricürük. Okkwi ipocçikothe po're pin mono akwanyo kathat, mpi'riko noppa ana onin tha'rko thu'rit inaththe'ra. ²¹ Okkwi ipalkothe lon ilokithak mpakorrannok inikkoik inaththut noprrok pin, ammakka mpalkothe lon ilokithak ana mpikkatheik onin ongappa noprrok pung.

²² Okkwi iponu unu akwoççikot lon ila Kanang erene ul iocçokothe lon loIeccuo.”

4

Prrok tothi'rot

¹ Manakka elli locothakothe, anokathakat cik animmakat kathat korothe'rot tokit kin akkaik ncürük. Ana po're ipi'rethin lon cittokit pokat ere thipil api'rethin itti, “Oku'rothe ntan cene, ana mpakeneng ilaik lathothakka amma lon elli locothakothe ila mpokat cik anerenthung.”

² Ittina aKanang o'rat naun animmakat prrok tokit kin tothi'rot apul p'rek paik apikkoik nan. ³ Ana okkwi ipokat cik akwikkoik nan pokat apollo ere pothok ipicci ere taco ana pothok ipo're. Thumpil thammrththakothe prrok ana thallio ere pothok ipicci. ⁴ Ana orrok w'rek arrial ana ikken koco'rin (24) wokat wammrththakothe prrok pen ana wonat ul ittittik ia arrial ana ikken koco'rin. Okin thokat thakot eret wipuk ana mupul ima mokkattathe nothaap. ⁵ Ak'ran kocingki akkakat nnoprrok ere thule'rak thaku'rullo thokapik. Ana lik lokat alocco tokit kopprrok le're'rapuruk, lik len lokat kanang koKapik. ⁶ Ana acakuruk tokit kopprrok, pap'rek pokat cik ere tok irapangka ironat ng'ri ngallio ere nga'ra ana ngo'rillir.

Ana itho'rkit thoprrok a'rupu iaik ngkit thapat wokat cik woco'rin ana wonat kit noka ken appik. ⁷ Papu porokit nti ia'rupu iaik ngkit thapat pokat pungkot thepa ana ipamakot pokat pungkot ngura ana ipomakothe nomaun m'rapuruk ponat toca ere pul iponyi, ana ipomakothe maun moco'rin pungkot kathu're. ⁸ A'rupu appik auroco'rin iaik ngkit thapat wonat u'ruccu kurekkurek w'rakkuruk w'rakkuruk ana wonat kit nan appik, manna ciki icu're cou'ruccu. Ana a'rupu wen wokat angwo nokk'rokk'ra ana nokkonokki itti, “Thupupure, thupupure, thupupure, thalli Kapik ikalkothe cik, okkwi ipaik ana ipokat cik ana ipaik panthan.”

⁹ Ana amma a'rupu iaik ngkit thapat ethet Kapik thrik ana othiane cik, okkwi ipaik pikkoik noprrok ana okkwi ipakinnio thupuththuput, ¹⁰ aul ittittik ia arrial ana ikken koco'rin ee ungu nci ncapu tokit kokkwi ipaik noprrok ana a'ranok nga'rama ook ipaik ngkit thapat thupuththuput. Okin thirrie mupul men cik tokit kopprrok akin i're itti,

¹¹ “Ili win ana Kapik, ngkwekkot nan, itti ngkwacco thrik ana othiakine cik ana pu'ran, akka oung akkokohe a'rupu appik, ana wokkattathe akka ngkwongothe ana ngkwethet thikkoik.”

5

Atham ana thungkat

¹ Ana mpimmakathe atham io'remethekotherit ikkun wothothari wopul ipaik pikkoik noprrok wokurrakat nan nthoccul ana nthocarak ana wunnukkakothe nga'ra ma'ri me're'rapuruk. ² Ana mpimmakathe u'rupa wothothiletat woKapik iakannalkakot aipitto lon mpo're cittan itti,

“Oththa akkekkot nan itti kwakwe nga'ra naatham akwanyot?” ³ Anaruk pul pella ithi'rot ana manna nocapu ana manna ci thothir'in ipekkot nan itti panyot atham enni ana manna kwakatha tit. ⁴ Mpoot, anooat anooat akka pul pella ipekkot nan itti panyot atham ana manna okatha tit. ⁵ Ana opilin nti iul ittittik i'rekathin itti, “Kirrni oo, antokatha thepa thoul woIoutha, thiki thoThauth thalkothe tho'rak thung. Ook akkekkot nan itti kwakwe nga'ra naatham akwanyot.”

⁶ Ana ittina mpimmakathe thungkat athaco'ro itho'rküt thoprrok aththokkwettathe itho'rküt na'rupu iaik ngküt thapat ioco'rin ana ul ittittik ere thathokkuttat. Ana thonat lipil le're'rapuruk ana küt ke're'rapuruk, ikokat kanang koKapik ika Kapik kothillethe nocapu ncik appik. ⁷ Athungkat then akkakat athonekat atham nti ikkun wothothari wokkwi ipokat cik akwikkoik nopprrok. ⁸ Manakka kwonekot atham aa'rupu iaik ngküt thapat ioco'rin ana ul ittittik ia arrial ana ikken koko'rin eekat ungu ncik toküt kothungkat. Aul ittittik wen wonat ereneren inyaun kurekkurek ana maththak inyaun morkattathe nothaap ana moppappathe ngnga'ra iakkunako amutha, ia nga'rama ngoul iupupure. ⁹ Ana okin thongwathe kinye kie itti,

“Ngkwekkot nan itti ngkwaneke atham

akwe nga'ra nan,

akka ngkwokat pokkuttathe,

ana ngngüccük ngang ngkwokernet Kapik ul

noul mothok mothok ngkarru ken kurekkurek ana

karru appik ana ul appik ana ul wonomothok appik.

¹⁰ Ngkwothikkiet kin ngili ana ul wonoppa toKapik akin orekine Kapik konnon, ana okin thakkma capu ncik appik.”

¹¹ Ana mpokathakathe cik attang anocçikat po're pou'rupa wo'hothilettat wo'Kapik athar athar awamm-rththakothe prrok ana a'rupu iaik ngkît thapat ana ul ittittik. ¹² Angwat mpo're cittan itti,
 “Thungkat thekkot nan, ithokat thokkuttathe,
 athocco pu'ran ana tha'rthan ana thina cik nti ica ana thopo'rathan,
 ana thothiakine cik ana thrîk ana thopira noka.”

¹³ Ana ittina mpocçikathe a'rupu appik iaik ithi'rot ana nocapu ana ci thothîrin ana norok irapangka ana a'rupu iaik tit appik angwo itti,
 “Athopira noka oka nakkwi ipikkoik nopprrok ana nothungkat,
 athopira noka oka nounge ana thothia cik ana pu'ran thupuththuput.”

¹⁴ A'rupu iaik ngkît thapat ioco'rin i'rekat itti, “Amin” ana ul ittittik eekat ungu nci a'rakat nga'rama.

6

Thungkat thanyettet nya'ra natham

¹ Ana mpimmakathe thungkat athokwe nga'ra ngorokît nonya'ra inye're'rapuruk inyonemittathe natham. Ana mpocçikathe po're cittan ere thule'rak apapu p'rek nti ia'rupu iaik ngkît thapat ioco'rin api're itti, “A'rik.”
² Anokathakat cik animmakat capprththa cipuk tokît kin. Ana okwi iparrothe tan ponat onnan pocopok ana copok ana kwakot pakiettat cupul ica ana kweot akwothalkot tho'rak ana okicce ul noka'ran.

³ Anakka thungkat thokwet nga'ra ie'ra iunukkakat natham, anocçikat apapu ipaik ngkît thapat ipe'ra api're itti, “A'rik.” ⁴ Acapprththa c'rek appakkakat co're. Okwi iparrothe tan pokat pettathe ki'rittang ikukwit kittik ana

kwonat ngili ikkun itti kwapa're lon iloporot cik nocapu aul onguttetto.

⁵ Anakka thungkat thokwet nga'ra iunukkakot natham i'rapuruk, anocçikat po're popapu ip'rapuruk iapaik ngkît thapat api're itti, "A'rik." Anokathakat cik animmakat capprhtha conyi ana okkwi iparrothe tan ponat papu ipekkietta na'rupu ikkun wung. ⁶ Ittina anocçikat po're nti itho'rkît tha'rupu iaik ngkît thapat ioco'rin api're itti, "Caththak comil culukku iconat thinar thulukku. Ana caththak comiloththu iconat thinar th'rapuruk. Nokorronno okitto ngaak ana ngapak."

⁷ Anakka thungkat thokwet nga'ra iunukkakot natham inoco'rin anocçikat po're popapu ipaik ngkît thapat ipoco'rin api're itti, "A'rik." ⁸ Anokathakat cik animmakat capprhtha cupukatheik. Okkwi iparrothe tan ponat k'ran itti thio, ana thothîrin thokat cik athommakothok. Capu cokat cillakot tit mprak woco'rin. Okin thokat thoccot kamprak kulukku okin aththuththe'ra thokat thoccot lon ikkun lokamprak kulukku kocapu ncik appik itti okin thangwo ul nocapu ngk'rittang ikukwit ana nti ana mmio imokithak ana nna'rupu worikira wonocapu.

⁹ Anakka thungkat thokwet nga'ra natham iunukkakot nga'ra iukuluk, animmakat utha woul ionguttat nti ilon lon loKapik ana nti ilon ilakin therethe oleccuo ngngin thoceken coru'rot ta'rama. ¹⁰ Okin thi'rekathe mpo're cittan itti, "Onin tha'rikot cik manna kartha, Ili ionu lon ikkun ana iupupure ana iaik icat, athonce'renthe nîn lon cik nnul wonocapu enni ana athokkenenîn ngüccük ngin?" ¹¹ Okin thikkettakathe eret wipuk. Ana okin thi'rettakathe itti okin tha'rikot cik puccuk apangon ana mopurukon itharekine oleccuo onguttakat ithonu itti okin thangutta karkken.

¹² Mpimmakathe akka akwokwe nga'ra iunukkakot natham i'rakkuruk. Capu co'rintittakathe ncik ikki-theththak. Ai'rīmak o'rat nocīngkī ere kret ikonyi ikokkattathe norua toīmīt, akwanok o'riakat cik ere ngūc-cūk ¹³ ana mothot morithi'rot mapukkathe nocapu ere icīt wapukkot nopīcīt wakanang kīcet. ¹⁴ Tothi'rot to'remethettakathe ere atham, io'remethettat ana mo'rong appik ana cik iconthomat corirok irapangka cintakatheik.

¹⁵ Ana nili nonocapu ana ul ittittik woul irro ana ul iatha'rthan ana ul ionu pu'ran ikkun ana ul iaiak ana iakonnoka iaiak tharuko imu'rol ana imopong momu'rol. ¹⁶ Okin thi'ret mo'rong itti, “Napukkot nanin anno'rumot nīn othakka itti akkwi ipaik pikkoik noprrok poili okorronno imma nīn ana nothua ka thothungkat. ¹⁷ Akka ca'ri icīrik cothua ka caat, ana oththa akkakoik nti ithua ka ithaik thanthan?”

7

Ul 144,000 ionemittathe

¹ Manakka elli locothakothe, anappimmakat u'rupa wothothilettat woKapik aco'ro nomipit mocapu ncik appik amumoco'rin, apakket kanang than akka akokkurot capu ana tok irapangka ana manna kira. ² Anappimmakat u'rupa wothothilettat woKapik w'rek anthan na acīngkī ummot ngngin awonu urret woKapik ikaik. Akwakkarat u'rupa wothothilettat woKapik ioco'rin mpo're cittan iokat woccot pu'ran itti wie capu ana tok irapangka ka kongo, ³ akwi'rekat u'rupa wothothilettat woKapik ioco'rin itti, “Nantoco'ro nokorronno iie capu ana tok irapangka ka kongo ana manna kira aron tharthuk okkot urret nomuthu moul iarekine Kapik konnon.” ⁴ Ana itina mpocckithe maun mokkwion ithokkattanthet urret

nomuthu men maun athar arrial ukuluk ana ikken arrial we'ra ana ikken koco'rin (144,000) noul woIccereil appik.

⁵ Ul woIoutha wokat athar attul ana ikken we'ra (12,000) iokkattanthe urret.

Ul woRopin wokat athar attul ana ikken we'ra (12,000) iokkattanthe urret.

Ul woCath wokat athar attul ana ikken we'ra (12,000) iokkattanthe urret.

⁶ Ul wAccir wokat athar attul ana ikken we'ra (12,000) iokkattanthe urret.

Ul woNaphthalim wokat athar attul ana ikken we'ra (12,000) iokkattanthe urret.

Ul woManacce wokat athar attul ana ikken we'ra (12,000) iokkattanthe urret.

⁷ Ul woCcomoun wokat athar attul ana ikken we'ra (12,000) iokkattanthe urret.

Ul woLau i wokat athar attul ana ikken we'ra (12,000) iokkattanthe urret.

Ul woIaccakkar wokat athar attul ana ikken we'ra (12,000) iokkattanthe urret.

⁸ Ul mothok moCapulun wokat athar attul ana ikken we'ra (12,000) iokkattanthe urret.

Ul woIuccip wokat athar attul ana ikken we'ra (12,000) iokkattanthe urret.

Ul woPeniemin wokat athar attul ana ikken we'ra (12,000) iokkattanthe urret.

Ul woppot wakot eret wipuk

⁹ Anakka elli loothakotho animmakat cungkut coul woppot tokit kin comma manna ongantetta noul wonomothok appik ana ul mothok mothok ngkarru ken kurekkurek ana ul appik ana karru akin oco'ro tokit koprruk poili ana tokit kothungkat. Okin thakot eret wipuk ana okin thonat u'ri wokira kothemur inyaun.

¹⁰ Ana okin thokat cik akin i're mpo're cittan itti,

“Tho'rettat thoKapik konnon,
ikaik kikkoik noprrok,
ana thungkat.”

¹¹ Ana u'rupa wothothilettat woKapik appik wokat aco'ro
akkwet prrok itho'rküt ana ul ittittik ana a'rupu iaik
ngküt thapat ioco'rin. Ana okin thekathe toma ncik toküt
koprrrok ana okin tha'rakanthet Kapik nga'rama, ¹² akin
ongwat itti,

“Amin,
thopira noka ana thrük
ana thinaik nti ica ana thopirane noka,
ana thothiakine cik ana pu'ran
oka thoKapik konnon thupuththuput.
Amin.”

¹³ Ittina apilin nti iul ittittik ipittathin itti, “Oththan
enthi ithakot eret wipuk? Ana okin thaat ngkartha?”

¹⁴ Ana mpothianthok tit itti, “Pit pin, ngkwina.”

Ana kwi'rekathe itti, “Okin enthi ithokkot cik nti
ithokkiettat thiak kannan, okin thimet eret wen ngüccük
ngothungkat ana ngothikkiekanthet kin eret wo'rillir.

¹⁵ Ilen akka,
Okin oco'rine toküt koprrrok poKapik,
akin orekinok nokkonokki ana nokk'rokk'ra noppan
toKapik tung.

Ana okwi ipaik pikkoik noprrok pangwot nthokaik
thung.

¹⁶ Okin thakorronno appiama,
ana manna pica pakorronno appokkwot kin.

Ana cingki cakorronno appok'rekin.
ana manna lü l'rek.

¹⁷ Akka thungkat ithaik itho'rküt thoprrok thangwot kin,
kwipot kin nomaku'rang moi'ri.
Ana Kapik kukukkot kin ngeme nti iküt.”

8

Thungkat thanyot nga'ra ie're'rapuruk

¹ Anakka thungkat thanyothe nga'ra iunukkakot natham ie're'rapuruk, cik cangkatheik tothi'rot appik papotteik.

² Ana mpimmakathe u'rupa wothothilettat woKapik ie're'rapuruk aco'ro tokit koKapik aweettathe lipil le're'rapuruk.

³ Au'rupa wothothilettat woKapik w'rek appakkakat aco'rat tokit koru'rot ta'rama nga'rakaththak ngokkattathe nothaap iak'rettat nga'ra iakkunako amutha tit. Ana wokat wettakathe nga'ra iakkunako amutha arttot nan othakka itti akwethet Kapik ngnga'rama ngoul woKapik noru'rot ta'rama irokkattathe nnothaap tokit koprrrok polli. ⁴ Kucuk kaa'ra iakkunako amutha ngnga'rama ngoul woKapik thoku'ranthet Kapik nti ikkun wou'rupa wothothilettat woKapik. ⁵ Ana ittina u'rupa wothothilettat woKapik wonekathe nga'rakaththak anekkekat thik tit thakkummot noru'rot ta'rama, arrekat nocapu, athule'rak olliati akapik oku'rat ana ollio, acapu o'rintittakat.

Lipil ile're'rapuruk

⁶ Ittina au'rupa wothothilettat woKapik ie're'rapuruk ionat lipil le're'rapuruk wokuccekatheik aee lipil.

⁷ Au'rupa wothothilettat woKapik worokit eekat thipil thung, akapik apat mmothot ana thik thocikittakot ngngüccük tit apat nocapu. Capu cokat cillillakot tit mprak w'rapuruk. Kamprak kulukku konocapu ana kira ana taco thokat thok'rathe.

⁸ Au'rupa wothothilettat woKapik ie'ra eekat thipil thung, apap'rek pungkot co'rong icittik pokat cik apocco

thik apat irok irapangka. Ai'ri illillakat tit mprak w'rapuruk. Kamprak kulukku koprttakathe ngüccük, ⁹ ana kamprak kulukku ka'rupu iaik ngkit thapat illekat ana kamprak kulukku kouppu'rung wonoi'ri wokittakathe.

¹⁰ Au'rupa wothothilettat woKapik i'rapuruk eekat thipil thung, acothot cättik apat ntothi'rot acocco ere thik. Nue inapangka nillillakathe tit mprak w'rapuruk. Cothot icirik capathe nokamprak kulukku. ¹¹ Cothot cen conat k'ran itti Thopia. Ng'ri ngopiakathe ana ul woppot willekanthet thopun then.

¹² Au'rupa wothothilettat woKapik ioco'rin eekat thipil thung. A'rupu iaik ithi'rot willillakathe tit amprak w'rapuruk. Kamprak kulukku kocingki ana kokwanok ana komothot thi'rimakathe. Kamprak kulukku koricingki ana koringko'ra thi'rimakathe.

¹³ Anakka mpimmat lon len, anocikat po're pokathu're ikokat cik itho'rküt thothi'rot aki're itti, “Angkre, angkre, angkre, noul wonoththok empi, amma u'rupa wothothilettat woKapik i'rapuruk weet lipil lon ilokithak laik lainenon.”

9

Thipil ithukuluk thonat n're nonomun

¹ Au'rupa wothothilettat woKapik iukuluk eekat thipil thung, animmakat cothot icokat capothe nocapu ntothi'rot ana cokat cettathe lon ikkun lorupu tothothirin.

² Manakka canyothe cürük icuo thothirin akucuk akkakat nthan keththung ere kucuk kokaman ikaik kak'ro. Cingki ana cik appik cü'rimakathe ngkucuk kothothirin. ³ Ana kat kakkakathe nti ikucuk ken akakkakat nocapu nti ikucuk ken ana kettakathe pu'ran pongee ere ngee ngokünü konocapu. ⁴ Ana kakki'rettathe itti kakinnie taco ka kongo

ana kira ikauro, anaruk kie ul ionyi ka kongo tulluk iakon-nokkattanthe urret woKapik nomuthu men. ⁵ Ki'rettathe itti kakorronno ongwo ul enni anaruk itti kaccokiet kin thiak, anak ukuluk. Thocokiet thiak ere amma künü kok'rot pul. ⁶ Ana noma'ri manok wothocokot thiak, ul wakwancot kathar ikakin ille ngingin anaruk okin thakan-riot, okin thangat itti okin thille anaruk thio thapelenekin.

⁷ Kat kokat kungkot mapprththa makietat a'rupu wotho'rak. Kakot a'rupu w'rek ima wungkwot mupul imokkattathe nothaap ana toma men mungkot mouli ionyi. ⁸ Konat wan wungkot woul iari, ana kinyit kokat kungkot kolepa. ⁹ Kakot amarang toperere wungkot amarang wotho'rak iokkattathe na'rponde ana u'ruccu wokat akkot po're ere mapprththa moritho'rak amma amopelle eo itho'rak. ¹⁰ Konat uththik lli nan ere uththik woünü ana wonat lon ikkun itti kie ul ka kongo anak ukuluk. ¹¹ Ili wen wokat u'rupa wothothilettat woKapik iangwot cürük cothothirin, k'ran koili wen ngkarru koIpranin itti Apathun (ikonu itti okkwi ipakittoik) ana ngkarru koul woKrik itti Apolion.

¹² Angkre ngononun ngeot ncik, ana ngarthuk ncik nge'ra ngaik nganhan.

¹³ Au'rupa wothothilettat woKapik i'rakkuruk eekat thipil thung, anocikat apo're anthan nti ilo'rikit lolipil ilokat nomipit moru'rot ta'rama irokkattathe nothaap tokit koKapik. ¹⁴ Ana pi'rekathu u'rupa wothothilettat woKapik i'rakkuruk ionat thipil itti, "Elikki u'rupa wothothilettat woKapik ioco'rin i'rikikkakothu norue tIp-prath." ¹⁵ Ana u'rupa wothothilettat woKapik auroco'rin iokat wokuccettanthe cingki enci cik ana ca'ri enci cik ana kwanok engki cik welikkakathu itti wathongwo ul app'rut noca'ri enci ana noringki enci ana nokwanok

engki ana nothuput enthi. ¹⁶ Mpoccikothē itti ul wen wotho'rak wokat athar athar arrial ukuluk ma'ri me'ra opakket orrot tit.

¹⁷ Ana mpathantakathe itti mpimmat mapprrththa ana ul iarrothe tan wonat amarang wotho'rak wonat lurru loppot tit l'rek lo're ere thik a'rumot toperē ana a'rek wungkot kucuk a'rek wungkot alpurat. Mapprrththa monat ma mungkot molepa ana lik ana kucuk ana alpurat akanthan nti ithon then. ¹⁸ Ul app'rut willekathe na'rupu w'rapuruk, ngkucuk ana nthik ana nalparut iokat anthan nti ithon thomapprrththa. ¹⁹ Mapprrththa monat pu'ran ithon ana nouththik. Uththik wokat wungkwot inyil ana wonat ma imakin iie ul ka kongo ngngin.

²⁰ Anaruk ul iokkot cik nti imio emmi w'rakathe opa'rīne lon len cik ilakin thokkothe nyaun nyen akin oīne Kapik. Okin tho'rungkathe akin a'rane u'rupa iokithak nga'rama ana a'rupu w'rek iokkattathe nothaap ana mallong ana a'rponte ioiththa ana mothok ana o'ren iakinnimmaik ana manna wakannere ana manna wakan-nocckikot cik ana manna wakannyaro. ²¹ Ana manna okin thakannopa'rīne thongwo ul cik ana thurukut ana tha'ro nul nuthuk ana manna thu'ran.

10

U'rupa wothothīlettat woKapik ana atham iotte

¹ Ana mpapprimmakat u'rupa wothothīlettat woKapik w'rek iannalkakot aanthan ntothi'rot aanthan nocapu. Wokat wakot nuththe ana thumpil ica, toca tokat tungkot cingki ana tacok tokat millang molik. ² Ana kwonat atham iotte io'remethekotherit ikkun iokat wanyat-tatheik. Kwoco'rathe nuek wothothari irok irapangka ana nuek wothokure nocapu iconthomat ³ ana kwekathe po're cittan ere thepa. Anakka kweet po're, apo're

pothoku'rullo thokapik ipe're'rapuruk erekat. ⁴ Manakka thoku'rullo thokapik theret, mpokat cik anoccot kit cik itti mpakurro anaruk mpocckathe po're ntothi'rot api're itti, “Unukkothe po're pothoku'rullo thokapik ipe're'rapuruk ngothunukkot a'rupu akorronno okurrot cik.”

⁵ Ana u'rupa wothothilettat woKapik ia mpappimmat aco'ro nuek irok irapangka ana a'rek nocik iconthomat onthat ukun wothothari tothi'rot. ⁶ Akwarrmakat okwi ipaik ngngin thupuththuput ana ipoku'ret ithi'rot ncik ana a'rupu appik iaik tit ana ipoku'ret capu ncik ana a'rupu appik iaik tit ana ipoku'ret tok irapangka ncik ana a'rupu appik iaik tit ana kwi'rekathe itti, “Thoccoik thella. ⁷ Noma'ri ima u'rupa wothothilettat woKapik ie're'rapuruk watheet thi'pil thung nan, kumitta koKapik ikommakot nan kacothakot ammakka kwerenet ul wung iarekinok wothernte lon loKapik.”

⁸ Apo're pomai ipa mpocckithe ntothi'rot i'rekathin itti, “Ngko athoneko atham iotte io'remethettatherit nti ikkun wou'rupa wothothilettat woKapik iaik waco'ro irok irapangka ana nocapu iconthomat.”

⁹ Ana mpoingkanthet u'rupa wothothilettat woKapik anipittathok itti kwethin atham io'remethetherit, au'rupa i'rekathin itti, “Loporot itti ngkwaneko a'rko, wapieng icarak anaruk wakanung ithon ere aun.” ¹⁰ Ana mponekathe atham iotte io'remethettatherit nti ikkun wou'rupa wothothilettat woKapik ana mpo'rkkathe. Wikkinin cik ere aun ithon akka anocuko, anaruk akka mpothurukket apiekathin icarak. ¹¹ Ana mpi'rettakathe itti, “Ngkwonu itti ngkwerene ul ncik appik ngkarru ken kurekkurek ana ul wonomothok appik ana karru appik ana nili ncik appik lon loKapik ilathothakka.”

11

Ul ie'ra iimmat lon ngkit

¹ Mpokat pettathe ku'ricil kokupir kothekkiettaik ngngin, ana mpi'rettakathe itti, “Ngko athekkie tupan toKapik ana tu'rot ten, angantekat ul. ² Anaruk akorronno ekkie ka'ran kothapat akka keettathe ul appik iakannoka woIouth. Okin thacukkarot ka'ran ikupupure ken cik anak arrial we'ra ana ikken ke'ra (42). ³ Ana mpethet ul ie'ra iimmat lon ngkit lon ikkun atherene ul lon loKapik ma'ri kathar ana arrial ukuluk ma'ri me'ra ana ikken arrial w'rapuruk (1,260) akin thakot eret iakene itti okin thaik ithmeru.” ⁴ Ul enni ie'ra iimmat lon ngkit okin kira ike'ra ikocot k'ran itti ceiththun ana o'ren ie'ra na mu'ru imonu ngaak iacco ikkoik aco'ro tokit kolli wocapu ncik appik. ⁵ Amma opilingon thennekke itti okin thie ul wen ka kongo, thik thanthan nti ithon then ana tha'rko tho'rak then. Kathar engki ika ul ille ngngin iongothe itti wiekin ka kongo. ⁶ Ul enni wonu lon ikkun itti okin thunukkot cik tothi'rot othakka itti akapik okorronno apo amma okin thaik there lon loKapik ana okin thonu lon ikkun itti okin thaprtto ng'ri ngorinok cik athakka ngüccük ana attatta capu llon ilakin thongothe itti okin thattatta ngngin.

⁷ Amma okin thocothe there lon loKapik, pap'rek poripira panthan nci thothirin aprro iakin apongwat kin. ⁸ Ana ka ken ikillet ka'rungskot cik ikathar noka'ran ikrik ikungkot pothok ipocot k'ran itti Cothum ana Muccir na Ili wen wiothe nothapak. ⁹ Ana noma'ri m'rapuruk ana app'rut, ul appik ana mothok mothok ngkarru ken ana karru appik ana ul wonomothok appik wakathacce ka ikillet ken, ana okin th'ra itti ka ikillet kakannocikkako. ¹⁰ Ul appik wonocapu wapira noka nothille thoul wothernte lon loKapik ie'ra ana okin thakkot kamuthe ana akin

ukkwo ana ikkettot a'rupu nuthuk akka ul enni iernte lon loKapik wokkiethe ul iaik nocapu thiak appik.

¹¹ Anaruk akka ma'ri m'rapuruk ana app'rut meot ncik, akanang koKapik kothikkoik i'rikat iakin ana okin thurokathe kapik akin oco'rat noracok. Ul wipathe n're kannan appik iokathaccet kin. ¹² Ana okin thocckathe po're ntothi'rot api'ret kin itti, “Noku'rot ntan cene.” Ana okin thoku'rathe tothi'rot inuththe atho'rak then okathaccekin.

¹³ Ana nocingki cen acapu o'rıntittakat ncik ikki-theththak. Ka'ran killillakthe tit amprak attul ana kamprak kulukku kokat kokittakot. Ul willekathe athar we're'rapuruk (7,000) ana okkwion ithokkot cik thipathe n're kannan akin opirakanthet Kapik noka korothi'rot.

¹⁴ Angkre ie'ra ngeot ncik anaruk angkre i'rapuruk ngakko ci napuththut ngaik ngao.

Thipil ithe're'rapuruk

¹⁵ U'rupa wothothilettat woKapik ie're'rapuruk wekathe thipil, anocckat po're cittan ntothi'rot api're itti,
“Ngili ngonocapu ncik appik ngothakkat ngili ngolli wonon ana ngoMiccie pung
ana ook akkakkma thupuththuput.”

¹⁶ Aul ittittik ia arrial ana ikken koco'rin (24) iokat cik aikkoik norrok tokit koKapik eekat toma ncik akin a'rakanthet Kapik nga'rama, ¹⁷ akin i're itti,
“Onin thopiranung noka, Ili Kapik iakannalkakot,
okkwi ipaik ana ipokat cik,
akka ngkwonekot pu'ran pang iprik
ana ngkwaik pakkma nngin.

¹⁸ Ul wonomothok appik wokat wua ka ana thua ka thang thaat.
Ca'ri caat cothakkma ul iokat willet ana okke ul iorekinung wothernte lon loKapik

ana ul wang iupupure ana okin appik ithapellene k'ran kang,
 ithopo'rot than ana ithakannopo'ra than.
 Ca'ri caat icapa're ul cik nocapu iokat cik angwo ul nocapu.”

¹⁹ Ana tupan toKapik torothi'rot tanyattatheik ana noppa than, centhuk cothonek ket lon cik coKapik cim-makakathe. Athule'rak ana po're ana capu o'rüntittako ncik ana kapik ngkanang ana mothot okakat cik.

12

Pul ipopari ana papu ipokithak ipungkot pre

¹ Ana lon ilommaththik ana littik lokakatheik tothi'rot. Lon len lokat cik ittina, pul ipopari pakot cingki noka ana pokat cik apoco'ro nokwanok ana pakot cupul ica conu mothot nan attul ana ikken ke'ra. ² Pokat poppethe ana ukul wokath ake'rellok itti pakwono ana pikkatheik apoo. ³ Alon l'rek appummat ncik tothi'rot ilommaththik ana lon len lokat itti, papu ipokithak ipungkot pre po're ittiang ana ponu ma me're'rapuruk ana lipil attul ana mupul moili me're'rapuruk noma ime're'rapuruk. ⁴ Kuththik kopapu pen kollakathe mothot app'rut nti ithi'rot amapukkat nocapu. Papu ipokithak ipungkot pre pen poco'rathe tokit kopul ipopari ipokat cik pathokwono othakka itti amma ukul wokwontat apothurukkwe. ⁵ Pul ipopari pen pokwonathe ukul iocura okkwi ipathakkma ul ncik appik nocapu ncu'rang coili copaponte. Anaruk ukul wothikakathe aku'rettakanthe Kapik ana prrok pung. ⁶ Ana pul ipopari pollathe eo ithampang ithonthomat noka'ran ika Kapik kokucenthok cik, na apanguttat ma'ri kathar kulukku ana arrial ukuluk ma'ri me'ra ana ikken arrial w'rapuruk (1,260).

⁷ Tho'rak thurokathe ncik tothi'rot. OMikkail ana u'rupa wothothilettat woKapik thrrathe ipapu ipokithak ipungkot pre, ana papu ipokithak ipungkot pre ana u'rupa wothothilettat wung thrrathe iaMikkail. ⁸ Ana oMikkail ana u'rupa wothothilettat wung thalkathe papu ipokithak ipungkot pre, ana u'rupa wothothilettat wopapu ipokithak ipungkot pre ana pre thellakathe ka'ran cik tothi'rot. ⁹ Papu ipokithak ipungkot pre iprik porrettakathe nocapu. Kwokat pinyil ipipe ipoccot k'ran itti pul pothopulut okkwi ipurttet ul cik nocapu appik. Kwokat porrettathe nocapu nnu'rupa wothothilettat wung.

¹⁰ Ana mpocckathe po're cittan tothi'rot api're itti,
 “Tho'rettat thaat inenni ana pu'ran ana ngili ngoKapik
 konnon,
 ana pu'ran poMiccie pung.
 Akka okkwi iparttuket opang ponnongon tokit koKapik
 icingki ana ngko'ra,
 porrettathe nocapu.

¹¹ Okin thalkathok
 nngüccük ngothungkat
 ana nthere lon icat loKapik,
 okin thellat lon lothikkoik then nti ilon loMiccie.

¹² Ittina nopira noka appik onon ithaik tothi'rot
 ana onon ithaik thikkoik than
 anaruk angkre nocapu ana norok irapangka,
 akka pul pothopulut poinet non nocapu
 ana pua ka kannan,
 akka kwina itti ma'ri mung motte.”

¹³ Anakka papu ipokithak ipungkot pre paththiot itti porrettathe nocapu pikkatheik apommakot pul ipopari ipokwonot ukul iocura appua ka. ¹⁴ Pul ipopari pokat pettathe u'ruccu we'ra wokathu're othakka itti apirro nngin apeo noka'ran ikonekkettanthok cik ithampang

ithonthomat na apanguttat luput l'rapuruk ana app'rut othakka itti apinyil ipipe ipoccot k'ran itti pul pothopulut okorronno iothok. ¹⁵ Ana papu ipokithak ipungkot pre puttekathe ng'ri cik ere ng'ri ngonorue othakka itti athoneko pul ipopari. ¹⁶ Anaruk capu cittarathe pul ipopari akka canyothe thon cik acothurukkekat tue iraat ntithon thopapu ipokithak ipungkot pre. ¹⁷ Ana papu ipokithak ipungkot pre puakathe ka nopul ipopari ana poingkathe apothrro inyukul nyopul ipopari ana okkwion ithaccikot lon loKapik ana occokot lon ileret oIeccuo.

13

¹ Ana papu ipokithak ipungkot pre poco'rathe nocarkan corok irapangka.

Papu poripira paat nti irok irapangka

Ana mpimmakathe papu poripira apanthan nti irok irapangka. Ponat ma me're'rapuruk ana lipil attul, ana mupul monili attul nolipil. Ana noma men mokurakot 'ran nan wathocungko Kapik. ² Papu poripira ipa mpimmat pungkot papokira, anaruk ponat tacok tungkot tongun ana thon thungkot thothepe. Ana papu ipokithak ipungkot pre pekathe papokira pu'ran ana prrok poili ana ngili irik. ³ Mpimmakathe itti ca c'rek copapu poripira nti ipangken conat kinyi kittik ana kokat kittathe. Ana capu ncik appik coprttakatherit comakathe lon lopapu poripira. ⁴ Ul appik w'rakanthet papu ipokithak ipungkot pre nga'rama akka pethet papu poripira pu'ran ana nth'a'akanthet papu poripira nga'rama cakuruk. Okin thipittathe itti, "Oththa akkammakka papu poripira ana okkwen akrrro iaak?"

⁵ Papu poripira pokat pettathe thon itti pere lon lothipot ka thoura ana ocungko Kapik. Ana pettathe pu'ran itti pakkot ila pongothe anak arrial we'ra ana ikken ke'ra

(42). ⁶ Panyothe thon cik apikkat cik apocungko Kapik ana k'ran koKapik ana ka'ran na Kapik kaik ana ul iaik tothi'rot. ⁷ Pokat pettathe pu'ran itti prro iul iupupure woKapik apalkot kin. Ana pettathe ngili itti pakkma ul mothok mothok ngkarru ken kurekkurek ana ul appik ana karru appik ana ul wonomothok appik. ⁸ Ana ul wonocapu nci appik wa'rane papu poripira nga'rama. Okin itha 'ran wen wakannokurrakot iatham wothikkoik thothungkat ithokkuttathe acapu ncik appik carthuk oku'retta ncik.

⁹ Okkwi iponu kunu akwaccikot.

¹⁰ “Amma oplin ponu itti kwaeo ikorrkkor,
kwonu itti kwaeo ikorrkkor.

Amma oplin ponu itti kwio ngk'rittang ikukwit,
kwonu itti kwio ngk'rittang ikukwit.”

Elli lakeneron itti ul woKapik iupupure wonu itti wa'rungkot ilon nthocokot cikit ana o'rungkot notho'rumo nolon.

Papu poripira poppot nocapu

¹¹ Animmakat papu poripira p'rek apuroko nocapu, ponat lipil le'ra ammakka lothungkat anaruk peret ere papu ipokithak ipungkot pre. ¹² Papu poripira p'rek pokkothe ngre appik mpu'ran papu poripira porokit. Ana pi'rekathe ul appik ana capu itti wa'rane papu poripira nga'rama porokit ipa kinyi ikokithak kittanthet. ¹³ Pokkot lon ilommaththik ana manna kue thik nti ithi'rot attheo nocapu tokit koul appik. ¹⁴ Ana nti ilon ilommaththik len, kwettakathe pu'ran akwokkot ngre ngk'ran kopapu poripira porokit, kwammikkothe ul wonocapu appik. Kwi'rekathe ul lon lonthomat itti okin thakkot purrut popapu poripira ipokat peettat ngk'rittang ikukwit apokorronno iat akin othiane cik. ¹⁵ Papu poripira p'rek pokat pettathe pu'ran itti pakwot kanang ipurru

popapu poripira ipokkattathe apere ana ongwo ul apik i'rat a'rane purrut pen nga'rama. ¹⁶ Kwokkiethe ul lon mpu'ran appik, iprik ana ipotte, ipapa'rthan ana ipakannoka papa'rthan, ana ipa piak ana ipakannoka papiak, akin onekkettanthe urret nonyaun nyothothari ana manna nomuthu. ¹⁷ Othakka itti apul ella ipakero papu p'rek amma pella kurret ika k'ran kopapu poripira porokit ana manna maun mok'ran kopapu poripira.

¹⁸ Oron thonu itti oron thana thinaik nti ica cene. Apilin ipinaik nti ica ongante maun mopapu poripira, akka maun men mopul iponyi imamaun itti, 666.

14

Thungkat ana ul 144,000

¹ Ana ittina mpokathakathe cik ana mpimmakathe thungkat athoco'ro tokit kin ana thokat athoco'ro no-co'rong coCiun, nul athar arrial ukuluk ana ikken arrial we'ra ana ikken koco'rin (144,000) okin ithonat k'ran kung ana koththan kokurrakot nomuthu men. ² Ana mpocckathe po're ntothi'rot ere po're poi'ri ianthe nomo'rong amma kapik kapot ana ere po're pokapik amma akoku'rullo. Po're ipa mpocckithe cakuruk pungkot ere ul woppot waik wee ereneren tothun. ³ Ana okin thongwathe kunye kie tokit koprruk ana tokit ka'rupu ioco'rin iaik ngkit thapat ana ul ittittik. Pul pellat pinakathe kinye ken anaruk ul iokat maun athar arrial ukuluk ana ikken arrial we'ra ana ikken koco'rin (144,000) iokat welikkakot nnocapu. ⁴ Okin then thakanna'ro nul iari kirrkir ana okin thangwathe ka ken kupupure. Okin thammakot thungkat na akweo. Okin ithokettat nti iul wonocapu ana okin thettakathe Kapik ana thungkat akin othakka then ammakka a'rupu karkko thu'rit thonomun

ithettathe Kapik. ⁵ Okin thakannerente karra ana okin thakannorukettat llon l'rek.

U'rupa wothothilettat woKapik i'rapuruk

⁶ Ana mpimmakathe u'rupa wothothilettat woKapik w'rek airro itho'rikit thokapik awonu lon iloporot loIec-cuo athongkene ul iaik nocapu ana ul wonomothok appik ana mothok mothok ngkarru ken kurekkurek ana karru appik ana ul appik. ⁷ Kwi'rekathé mpo're cittan itti, “Nothiane Kapik cik annekathok thrík akka ca'ri cothakkma cung caat. Na'rane okkwi ipokkothe tothi'rot ana capu ana tok irapangka ana maku'rang moi'ri appik nga'rama.”

⁸ Au'rupa wothothilettat woKapik iammakittot pangken i'rekat itti, “Papot, pothok iprik poPapil papot ana papot akka pikkiét ul wonomothok ncik ngapak iopun kannan ana ngokorrónnathekin akin a'rok engngin nuthuk.”

⁹ Au'rupa wothothilettat woKapik nomaun m'rapuruk omakat kin ai'rekat mpo're cittan itti, “Amma okkwi ipa'rane papokira porokit nga'rama ana purrut pung ana manna okurro kurret nocuthu ana manna nokkun, ¹⁰ kwikko ngapak ngothua ka thoKapik, iuntathe nocaththak icoppathe nthua ka thoKapik. Ana kwakki-ettat thiak nthik thalparut tokit kou'rupa wothothilettat woKapik iupupure ana kothungkat. ¹¹ Ana kukuk ken kothoccokiettat thiak then ka'rumutho nti iakin thupuththuput ana okin thella thongoko cik icingki ana ngko'ra akka okin tha'ranet papu poripira nga'rama ana purrut pen ana okin ithokorrónnot akwokurro kurret kok'ran kung.” ¹² Elli lakene itti ul iupupure woKapik wonu itti wa'rungskot ilon nthoccokot cikit okorrónno

apo ka ntit, ana akin occikot lon ilonthomat loKapik ana o'rumo nolon loleccuo.

¹³ Ana mpocckathe po're ntothi'rot api're itti, “Okurri elli, thethietta thaka nakkwion ithillethe ilon loIli Kapik nciki inenni.” AKanang koKapik i'rekat itti, “ŋi okin thethietta akka okin thangoko nnore ngen ionthomat ana ngre ngen ioporot ngamakot kin.”

Thakkma capu

¹⁴ Mpokathakathe cik animmakat tuththe tipuk tokit kin ana pul p'rek pokat cik apikkoik noruththe kwungkot ukul wopul iponyi kwonat cupul coili noca cokkattathe nothaap ana ki'rittang korre ikakiako ngngin ikkun.

¹⁵ Au'rupa wothothilettat woKapik w'rek akkakat noppapan toKapik akkarat okkwi ipokat akwikkoik noruththe ai'rekat itti, “Oneki ki'rittang akio akka ca'ri caat cothokio akka a'rupu wo'riat.” ¹⁶ Ana okkwi ipokat cik akwikkoik noruththe okkiekat ki'rittang nocapu ana capu appik cokeccakathe.

¹⁷ Au'rupa wothothilettat woKapik w'rek appakkakat noppapan toKapik tothi'rot ana wonat ki'rittang korre ikakiako ngngin cakuruk. ¹⁸ Ana icci u'rupa wothothilettat woKapik w'rek ionat lon lothik ikkun, akkakat nnoru'rot ta'rama ai'rekat okkwi iponat ki'rittang ikakiako ngngin korre mpo're cittan itti, “Oneki k'rittang kang ikorre akeccet maa monocapu akka mo'riat” ¹⁹ Ana u'rupa wothothilettat woKapik wokkiekathe k'rittang cik nocapu ikakiako ngngin ana wa'rntathe karran komaa monocapu appik ana a'rntot maa men akworrekat icna cothua ka thoKapik. ²⁰ Okin thu'rukukkathe maa thapat nti icarak coman ana ngüccük ngollathe nti icana ana ngoppakatheik aku'rat ci tothon thocapprththa amma

aco'ro ncapprrththa. Ana ngollatheik appaththat cik ciththan.

15

U'rupa wothothilettat woKapik lon lotho'rarot cik

¹ Mpimmathe lon l'rek tothi'rot lommatthik ana laprrttakiettot tit. Mpimmat u'rupa wothothilettat woKapik we're'rapuruk awonu lon lotho'rarot cik le're'rapuruk ilocothothe akka thua ka thoKapik thacothakot llon len. ² Mpimmakathe pap'rek tokit kin pungkot tok irapangka tokkattathe nonga'ra ngocikittakot nthik. Ana ul wokat cik aco'ro iccik ken ialkothe papu poripira ana purrut pen ana maun mo'ran kopapu poripira. Okin thonat ereneren appik ia Kapik kikkethekin ³ ana okin thongwathe kinye koMucca pul iparekine Kapik ana kinye kothungkat akin i're itti,

“Ngre ngang ngommatthik ana ngaprrttakiettot tit,

Ili Kapik ialkothe cik.

Athar wang woco'rotheik ana waik icat,

Ili womothok appik.

⁴ Ili, oththa akkakorronno opellenung

ana othikkie k'ran kang thrük?

Akka oung pellek akkupupure.

Ul appik wantan

ana watha'ranung nga'rama

akka ngre ngang ioco'rotheik ngittakot ncik.”

⁵ Anakka elli locothakotho anokathakat cik animmakat tupan toKapik irokat cü'rük cothonekket lon cik corothi'rot accokat ncürük. ⁶ Ana u'rupa wothothilettat woKapik ionat lon lotho'rarot cik ile're'rapuruk opapat thapat noppa toKapik. Okin thokat thakot eret wo'rillir wallio ana ako a'rupu w'rek toperere wungkot u'rat wokkattathe nothaap. ⁷ Ana papu p'rek nti a'rupu

ioco'rin iaik ngkit thapat eekat u'rupa wothothilettat woKapik ie're'rapuruk maththak me're'rapuruk imokkattathe nothaap moppapathe nthua ka thoKapik ikaik thupuththuput. ⁸ Tupan toKapik toppakathe kukuk nothrik thoKapik ana pu'ran, pul pellakathe pi'riko noka'ran ka'rama au'rupa wothothilettat ie're'rapuruk warthuk omartto thuntet lon lotho'rarot cik.

16

Maththak ime're'rapuruk mothua ka thoKapik

¹ Ana mpocikathe po're cittan noppa toKapik api'ret u'rupa wothothilettat woKapik ie're'rapuruk itti, “Ngkonon annothunot maththak mothua ka thoKapik ime're'rapuruk nocapu ncik appik.” ² Au'rupa wothothilettat woKapik worokit oingkat athunat caththak cik nocapu, aul ionat urret wopapu poripira ana a'rane purrut pen nga'rama thoku'rathe inyi wokitheththak.

³ Au'rupa wothothilettat woKapik ie'ra unat caththak cung cik irok irapangka ana tok tothakkakathe ere ngücük ngopul iponyi ipiot. Ana a'rupu appik iokat irok willekathethe. ⁴ Au'rupa wothothilettat woKapik i'rapuruk unat caththak cung cik inue ana imaku'rang moi'ri ana mothakkakathe ngüccük. ⁵ Ana mpocikathe au'rupa wothothilettat woKapik iokat wonu lon ikkun loi'ri appik ai're itti,

“Thakkma thang enthi thoco'rotheik,

oung ipaik ana ipokat cik ana ipupure,

⁶ akka okin thuntethe ngüccük cik ngoul wang iupupure ana ul wothernte lon lang.

Ana ngkwethet kin ngüccük akin ikko, ammakka okin thekkot nan.”

⁷ Ana mpocikathe po're noru'rot ta'rama ari're itti,

“Ili Kapik ikalkothe cik,
kathar ika ngkwaik pakkma ul ngngin kaik icat ana
koco'rotheik.”

⁸ Au'rupa wothothilettat woKapik ioco'rin unat caththak cik nocingki acothakkakat cangko kannan acikkat cik acok're ul llü len. ⁹ Ul woka'rathe appik llü locingki ana okin thocungkathe k'ran koKapik ikonu lon elli ikkun appik lotho'rarot cik. Okin thakannopa'ranthet lon cik ilokithak len akin ethet Kapik thrük.

¹⁰ U'rupa wothothilettat woKapik iukuluk unat caththak cik noprrok popapu poripira ana ngili ngung ngothakkathe ngi'rimak appik. Ana ul wikkatheik ak'rellot kinyit thocipit nthocokot thiak ¹¹ ana okin thattattakathe Kapik korothi'rot nti ika ikokat akok'rello kin ana inyi iakin thonat. Anaruk okin thakannopa'ranthet lon len cik ilokithak ilakin thokkothe.

¹² Au'rupa wothothilettat woKapik i'rakkuruk unat caththak cik irue tipprath aronthomakat othakka itti arokkuccenthet nili kathar cik ana ul wen irro noka'ran na acingki ummot ngngin. ¹³ Ittina mpimmakathe u'rupa iokithak w'rapuruk wungkot nalapok, waat nti ithon thopapu ipokithak ipungkot pre ana nti ithon thopapu poripira ana nti ithon thopul pothernte lon loKapik ngkarra. ¹⁴ Okin thokat u'rupa iokithak ana wokat akkot lon ilommaththik ana okin thaine nili nonocapu ncik appik atha'rntot kin othakka itti akin athorro noca'ri icrik coKapik ikalkothe cik.

¹⁵ “No'rumoik akka mpanthan ere pul iponu thu'ran. Ana okin itha'rungkot ngkit thapat thethietta ana okkwi ipakot eret othakka itti okorronno onyaro cunthut ana ona n're.”

¹⁶ Ittina okin tha'rntathe nili appik noka'ran ikoccot k'ran ngkarru kolpranin itti Armakethon.

¹⁷ Au'rupa wothothilettat woKapik ie're'rapuruk unat caththak cik ikanang nuthuk ana po're cittan pakkatathe noppa toKapik noprrok po'li api're itti, “Lomttathe p'rin.” ¹⁸ Ittina thule'rak ana po're ana thoku'rullo thokapik ana tha'rıntittako thokitheththak thocapu. Tho'rıntittako thellat ammakka enthi ammakka pul iponyi pokkattathe nocapu, tho'rıntittako thokat thokitheththak kannan. ¹⁹ Pothok iprik poPapil pillillakatherit a'ran w'rapuruk ana ka'ran koul woppot kokittakathe. Ana Kapik kokwarikathe lon loPapil ilokithak akekat Papil caththak coppathe ngapak ngothua ka thoKapik apikko. ²⁰ Ana a'ran ionthomat worinok inapangka appik wintakatheik ana mo'rong appik mellakatheik. ²¹ Kanang kakkatathe ntothi'rot mmothot mimin makkwot manna pul amapukkot noul. Ana ul wattattakathe Kapik no'ron lotho'rarot cik lomothot imittimittik akka lokat loki-theththak kannan.

17

Pul ipopari ana papu poripira

¹ Opilin pulukku nti iu'rupa wothothilettat woKapik ie're'rapuruk ionat mpaththak me're'rapuruk painin api'rekathin itti, “A'rik, mpakeneng thakkmako ithaik thaine pul ipopari ipa'ro nul nuthuk ipaka'ran ikonat ngi'ri ngoppot. Kwaik ngk'ran koul appik iopa'rinet Kapik cik. ² Nili nonoththok ncik appik na'rorok ngngin, ana ul ia'rorok ngngin noththok appik wikkoik ere wikkot ngapak.”

³ Ittina akka u'rupa wokat naun, u'rupa wothothilettat woKapik wonekathin ika kothampang. Ana mpim-makathe pul ipopari ceneket appaik apikkoik nopapu poripira pothukkakot po're lol'rek ana ponat 'ran noka iacungko Kapik ana ma me're'rapuruk ana lipil attul.

⁴ Pul ipopari pokat pakot kret kothukkakot kothlo ere maa ana ko're, ana kokat akolloio ere thaap ana mallong imallio imonu cekerek crik ana muccu morirok imallio. Ana ponat keththe'ret kothaap ikkun koppathe na'rupu iokithak wotha'ro nul wung nuthuk. ⁵ Lon elli lokat lokurrakot nocuthu cung ila kumitta,

“PAPIL IPRĪK,
ONNAN POUL IA'RO NUL NUTHUK
ANA OOK AKKONU LON APPIK ILOKITHAK.”

⁶ Mpimmakathe itti ngüccük ngoul iupupure woKapik ana ul ierntethe lon loleccuo ionguttat nti ithocokot lon nomikät then, ien akka mpimmat itti ngüccük ngoul wen akkokkat cik au'rek ca.

⁷ Au'rupa wothothilettat woKapik i'rekathin itti, “Ngk-wontha akka aprttakot tit? Mpakeneng lon lopul ipopari ana papu poripira ipa kwarrotheran, iponu ma me're'rapuruk ana lipil attul. ⁸ Papu poripira ipa ngkwimmat pokat cik ca'ri c'rek, pakorronno okaik inenni ana panthan nthothir'in apeo apothio. Ana ul wonocapu ncik appik ia 'ran wen wakannokurrako iatham wothikkoik nci ammakka cik coku'rettat ncik waprttakot tit amma okin thimmat papu poripira, akka pokat cik ca'ri c'rek, ana pakorronno okaik inenni, ana icci panthan.

⁹ Elli lakene itti thinaik nti ica thonu itti thaka cene. Ma ime're'rapuruk monu itti mo'rong ime're'rapuruk na pul ipopari paik pikkoik. ¹⁰ Okin nili ine're'rapuruk cakuruk. Nili ukuluk nopa'rot cik nongili, wulukku waik noili, w'rek warthuk anthan anaruk amma waat ana wikkoik ma'ri mantaka. ¹¹ Papu poripira ipokat cik ca'ri c'rek ana inenni pellaik, ipen ili iamoromor. Ook p'rek nti inili ine're'rapuruk ana kwaik pathio.

¹² Lipil attul ila ngkwimmat lonu itti nili attul inarthuk occo ngili, anaruk okin thacco ngili noma'ri motte okin

opapu poripira. ¹³ Okin thonu lon lulukku itti okin thethet papu poripira lon ikkun len ana ngili. ¹⁴ Okin thro ithungkat anaruk thungkat thalkot kin akka ook Ili wonili appik ana okkwion ithakkarakat ana itho'rumot nolon thakaik okin atthut.”

¹⁵ Ana u'rupa wothothilettat woKapik wi'rekathin itti, “Ng'ri ia ngkwimmat na pul ipa'ro nul nuthuk paik pikkoik, nyaul ana mungkut moule ana ul wonomothok appik ana karru appik. ¹⁶ Papu poripira ipa ngkwimmat ana lipil attul ila ngkwimmat okin th'ra pul ipopari ipa'ro nul nuthuk. Okin thanekok akin okkiethok thiak akin antoththe naak cunthut, okin tha'rko kapa kung ana ok'rekok nthik. ¹⁷ Akka Kapik konekkethe lon nomikit men itti okin thana lon lulukku itti okin thethet papu poripira ngili puccuk alon loKapik othakkakat icat. ¹⁸ Ana pul ipopari ipa ngkwimmat ponu itti pothok iprik ipakkma nili nonocapu.”

18

Thokittako thoPapil

¹ Anakka elli locothakothe, mpimmakathe u'rupa wothothilettat woKapik w'rek auo ntan ntothi'rot. Wonat pu'ran ikkun pittik ana capu cupukakathe nthrik thung.

² U'rupa wothothilettat wi'rekathē mpo're cattan itti, “Pothok Papil papot, papot, pothok poPapil ipokat prik papot,

pothakkat kaman kou'rupa iokithak,
ana korrkkor kou'rupa iokithak
ana korrkkor kou'rupe iokithak ii'arakot
ana a'rupu ii'arakot.

³ Akka ul wonocapu ncik appik wikkot ngapak iopun ngopul iponu namat.

Nili nonocapu na'rorok ngngin,

ana ul iakettet ul wonocapu a'rupu wothakkat
a'rthan na'rupu wotha'rthan thung.”

⁴ Ana mpapproccikat po're p'rek ntothi'rot api're itti,
“Ul win, nopa'rinok cik
othakka itti annokorronno oka ilon lung ilokithak,
othakka itti alon lotho'rarot cik ilaik lainok alokor-
ronno ainenon.

⁵ Akka lon lung ilokithak la'rntakotho cik tothi'rot,
ana Kapik kokwarikotho ngre ngung iokithak.

⁶ Nokkinthok ammakka kwokkinthet opilingon,
nopakkenthok lon tit ma'ri me'ra ilokithak ila
kwokkothe.
Noppenthok cakkolok cung cungkak ngngapak
ma'ri me'ra.

⁷ Nokkiethok thiak ana ipiek thiak noka
ammakka tha'rthan thung itha kwomonanet ka
kung.

Kwipot ka thoura noucce wung akwi're itti,
'Mpaik pikkoik noprrok karkko ili iopari mpakan-
noka pacuruma
ana mpakannoka ithmeru.'

⁸ Ittina tho'rarot cik tholon ammakka thio ana ti ana
ithmeru
thainok noca'ri culukku.

Kwak'retta nthik,
akka Ili Kapik konthomat oththa akkakkmak.

⁹ Amma nili ina'rorok ngngin ana ikkoik thikkoik thoul
iaa'rthan okin aththut nimmarok akka akwok'ro ngkucuk,
nipo thiak thung ana oothok. ¹⁰ Okin thaco'ro ciththan
n're nothocokot thiak thung akin oo itti,
'Ngaia ooi, ngaia ooi, pothok poPapil ipakannalkakot,
lon lotho'rarot cik lo'rothok cik accokkot.'

¹¹ Ul iakette a'rupu woothok ana occokot thiak akka
pul pella pakerot kin a'rupu p'rin ¹² a'rupu ammakka

thaap ana mallong ana mothok imallio imonu cekerek crik ana muccu morirok imallio, ana eret iothukkwakot ana eret iinyan ana eret ionu cekerek coppot, ana a'rupu ammakka o'ren ia ul wongothe ionu cekerek coppot ana a'rupu appik ionu cekerek coppot iokkattathe nokinyit koumathon ana no'ren ana nomallong imoiththa ana na'roponte, ¹³ ana cakuruk a'rupu ammakka kira ikonu utha wakkunako ere amutha ana a'rupu iakkattat ngucul ammakka itti nyiritheni, ana ngapak ana ngaak, m're ana mil, kie ana lungkat, mapprrhtha ana a'rupu iathuthako mmapprrhtha, ul ionyi iaketta.

¹⁴ Ul iaa'rthan wi're itti, 'A'rupu ia ngkwokat pongothe weot ncik p'rin. A'rupu wotha'rthan thang ana thikkoik thang ithoporot thintatheik ana wakorronno appopakkot cik attang.' ¹⁵ Ul iatha'rthan iothakkat a'rthan iokat akette a'rupu ana iokat aiot tha'rthan naak waco'ro ciththan n're nothocokot thiak thung, akin oo ana ipo thiak ¹⁶ ana okin thoo itti,

'Ngaia ooi, ngaia ooi, pothok iprik,
 pakot kret konu cekerek crik ana kothlo ere maa ana ko're,
 ana kokat akollio nthaap ana mothok imonu cekerek crik ana muccu mori'ri imallio.

¹⁷ Tha'rthan enthi ithrik thokittakathe accokkot.'

Ul ionu lon ikkun louppu'rung wonoi'ri ana ul iar-rothe iuppu'rung wonoi'ri iaeo nciththan ana ul iallillie uppu'rung wonoi'ri ana ul iamona nti irok irapangka waco'ro ciththan. ¹⁸ Amma okin thimmat kukuk kothik ithaik thak'rekok akoku'rot ithi'rot ana okin thi're itti, 'Pothok p'rek pokat cik prik ammakka empi?' ¹⁹ Ana okin thapporet nunthu ima ana oo ana occokot thiak akin oo itti,

'Ngaia ooi, ngaia ooi, pothok iprik,
 okkwion ithonat uppu'rung wonoi'ri irok irapangka

thothakkat a'rthan nti itha'rthan thung,
kwintakatheik accokkot.

²⁰ Onon ithaik tothi'rot, nopira noka,
Ul woKapik ana ul wothothilettat woIeccuo ana ul woth-
ernte lon loKapik
wonu itti wapira noka.

Akka Kapik kakkmat Papil nti ilon ila pokkinthet non.' ”

²¹ Ittina u'rupa wothothilettat woKapik wonekathe
pothok pikkoik ere cna arrekat irok irapangka ai'rekat itti,
“Mpu'ran ittina

pothok poPapil iprik pikko parrettat nocapu
ana pakannappincat attang.

²² Ngeme ngoperenmperen ana ul iee ereneren ana ul iee
u'rumpillang ana lipil
ngakannappocikakot iaung attang.

Pul pella ipakette a'rupu.

Po're pocna pakannappocikakot iaung attang.

²³ K'ran kothik kakorronno appocco iaung attang.

Po're popul ipocura ipipo ana popul ipopari ipitta pakan-
nappocikakot iaung attang.

Ul iaa'rthan wang wokat wittittik nocapu ncik appik
ana nthurukut thang ngkwammikkothe ul appik ana
wurttakatheik.

²⁴ Nguccuk ngoul wothernte lon loKapik ana ngoul
iupupure woKapik,
ana ngoul ionguttathe noththok ncik appik ngin-
cathe iaak.”

19

Aleluia

¹ Anakka elli locothakothe, anocikat po're ere cungkut
coul tothi'rot api're itti,

“Aleluia,
tho'rettot ana thrik ana pu'ran thaine Kapik konnon

² akka thakkma thung thaik icat ana thoco'rotheik.
 Kwakkmat pul ipopari ipalle nul nuthuk
 okkwi ipokittot ul wonocapu ntha'ro thung nul
 nuthuk.
 Kwokkwothok othakka itti akwokke ngüccük ngoul wung
 iarekinok.”

³ Ana apo're pen appi'rekat attang itti,
 “Aleluia,
 kucuk ikaik ka'rumutho nti iaak ka'rumutho
 thupuththuput.”

⁴ Ul ittittik ia arrial ana ikken koco'rin ana a'rupu
 iaik ngkit thapat ioco'rin ekat ungu nciK nocapu akin
 a'rakanthet Kapik nga'rama, ikokat cik akikkoik noprrok,
 akin i'rekat itti,
 “Amin, Aleluia.”

⁵ Ana po're pakkakathe noprrok api're itti,
 “Nopirane Kapik konnon noka
 onon appik itharekinok,
 onon ithothianok cik,
 itharran ana ithittittik.”

⁶ Ittina mpocckathe po're p'rek ere po're poi'ri
 ngokapik nomo'rong amma akapik kapot ana ere po're
 pokapik amma akok'rullo api're itti,
 “Aleluia,
 akka Ili Kapik ikrik ikalkothe cik akkakkma capu nciK
 appik.

⁷ Ton opira noka ana iththrako kannan
 ana ethok thr'ik.
 Akka ca'ri caat cokamuthe kothipa thothungkat,
 ana pari pung pokuccekotheik.

⁸ Kret kipuk ippuk ikonu cekerek criK ana kella ngu'ru
 kokat kettathok akwako.”
 (Kret ikipuk kakene itti ul wella lon ilokithak tokit
 koKapik.)

⁹ Ana u'rupa wothothilettat woKapik wi'rekathin itti, “Okurri elli, okin ithakkarakothe thipa thothungkat thethiëttat.” Ana wapparttat nan itti, “Lon elli loKapik ilaik icat.”

¹⁰ Anakka elli locothakothe, anapat iracok tung ana'ranok nga'rama. Anaruk kwi'rekathin itti, “Kirnni elli, mparekine Kapik karkkang ana opangkangon th'rek, okkwion ithina lon ilimmakot ngkit ana ilerettathe oIec-cuo ngngin. A'ranet Kapik nga'rama. Akka kanang kothernte lon loKapik iken akkakene itti lon ilimmakot ngkit ana eretta loleccuo laik icat.”

Okkwi iparrothe tocaprththa icipuk

¹¹ Ana mpimmakathe tothi'rot tanyot ana capprththa cokat cik acoco'ro tokit kin cipuk, pul iparrotheran poccot k'ran itti Tho'rumo nolon ana Lon icat. Nthopekie lon thung, kwakkma ana okku're tho'rak. ¹² Kit kung kokat kungkot lu're lothik ana kwonat mupul moili noca mop-pot. Okin thokurrot k'ran noka kung, anaruk pul pella pina k'ran ken ook pulluk. ¹³ Kwakot kret kaccakiettat ngngüccük, ana k'ran kung itti Lon loKapik. ¹⁴ Ul irro worothi'rot wokat cik ammakothok awarrothe tomaprththa mipuk ana wakot eret wipuk ana wo'rillir ionu cekerek criik. ¹⁵ Ki'rittang ikukwit korre kaat nti ithon thung akongwo ul wonomothok appik. “Kwakkma kin ncu'rang conili copaponte.” Kwakene thua ka thoKapik ika akannalkakot ana kwakak'rot tho'rak than cik am-makka pul okak'rot maa noka'ran kothokak'rot maa icna. ¹⁶ Lokat lokurrakot nokret nocin ana icin itti, ILI İRİK WONILI İNİTTİNİTTİK ANA ILI WONILI APPIK.

¹⁷ Ana mpimmakathe u'rupa wothothilettat woKapik aco'ro nocingki akkaro u'rupe appik mpo're cittan iaik wirro ithi'rot thokapik itti, “Nanthan, na'rntakot

tothun appik annatho'rko thu'rit thocipin ithrik thoKapik
¹⁸ othakka itti annatho'rko ka konili ana ul ittittik woul
 woritho'rak ana ul ionthomat woritho'rak ana map-
 prththa ana ul iaurrotheran ana ka koul ionyi appik ia iak
 ana iakannoka iak, iarran ana ittittik.”

¹⁹ Ana mpimmakathe papu poripira ana nili nonocapu
 ana ul wen irro akin tha'rntakothe tothun akin othorro
 iakkwi iparrothe tocapprrththa icipuk ana ul wung irro.

²⁰ Anaruk papu poripira poccokittakathe okin opul poth-
 ernte lon loKapik ngkarra, okkwi ipokkothe lon lom-
 maththik ila papu poripira pokat itti pakkot. llon elli
 ilommaththik kwammikkothe okkwion ithokkothe urret
 wopapu poripira ana okkwion itha'ranet purrut wopapu
 poripira nga'rama. Papu poripira ana pul pung ipernte
 lon loKapik ngkarra thorrettakathe irok tothik thalparut
 ngkit nan. ²¹ Ul irro wung iokwentakot wonguttakathe
 ngk'rittang ikukwit ikaat nti ithon thokkwi iparrothe
 tocapprrththa icipuk, ana nengki noththakakathe nokapa
 koul ionyi.

20

Luput kathar

¹ Ana mpimmakathe u'rupa wothothilettat woKapik
 aanthan ntothi'rot ionu lon ikkun lorippu thothir'in ana
 ngngol ikkun ngonthomat ngittik. ² Au'rupa wothothilet-
 tat occokat papu ipokithak ipungkot pre ipa pinyil ipipe
 ana kwocot k'ran cakuruk itti okkwi ipammikkot ul ana
 pul pothopulut. Ana a'rupa wothothilettat wi'rikikkathe
 pul pothopulut luput kathar. ³ Au'rupa wothothilettat
 orrekathok ciki ippu thothir'in akwullukkathok kicce itti
 akworranno appammikkot ul wonomothok appik p'rin
 aluput kathar omarttakat. Ana amma luput lomarttakot,
 kwamelikkako ma'ri mantaka.

⁴ Ana mpimmakathe orrok ana ul iikkot cik nan wet-tathe lon ikkun itti okin thakkma. Ana mpimmakathe utha wokkwion ithokeccettathe ma cik akka okin thimmat ana ere lon loleccuo, ana akka okin thokat akin erentene ul lon loKapik. Okin thokat thakorronno a'rane papu poripira nga'rama ana purrut pen ana okur-rakinthet urret wung nomuthu ana nonyaun. Okin thokat thillet ana nthokkot cik ana okin thakkmakathe okin oMiccie luput kathar. ⁵ (Opilingon th'rek ithillet thakannuroko nti ithio mono aluput kathar omarttakat.) Thuroko enthi nti ithio thonomun. ⁶ Okkwion ithokat ithuroko thonomun thethiëttat. Akka thio ithe'ra thella pu'ran nakin, anaruk okin thathakka ul wononupan toKapik ana woMiccie ana okin thakkma okin aththut luput kathar.

Thakkmako thopul pothopulut

⁷ Ana amma luput kathar lomttathe, pul pothopulut pamelikkako nti ikorrkkor, ⁸ kwaeo akwothammikkot ul wonocapu ncik appik oKok ana oMakok, ana kwa'rntot kin tothun akin othorro. Okin thaka thoppot ere thamur thorirok irapangka. ⁹ Aul irro wopul pothopulut oingkat cungkut na'ran appik nocapu akin okkwekat ul woKapik itho'rkit ana ka'ran koUruccelim ika Kapik kongothe. Anaruk thik thakkakathe ntothi'rot athok'rekat kin akin intakat cik. ¹⁰ Ana pul pothopulut ipammikkothekin porrettakathe irok tothik thalparut, na papu poripira ana pul pothernte lon loKapik ngkarra thorrettathe. Okin thaccokot thiak ngko'ra ana icingki thupuththuput.

Thakkmako thoul illet

¹¹ Ana mpimmakathe prrok poili pipuk pittik ana okkwi ipokat cik akwikkoik nan. Capu ana thi'rot thollinok ana nthellakathe ka'ran cik na akin ikkoik.

¹² Ana mpimmakathe ul iokat willet ittittik ana iarran aco'ro tokit koprruk poili ana natham nokat nanyattatheik. Atham w'rek wokat cik wanyattatheik ana ien atham wothikkoik. Ul iokat willet wokat cik akkmakot nolon ila akin thokkothe ammakka lokurakot inatham. ¹³ Tok irapangka tothukkwathe ul illethe irok thapat, ana thio ana thothirin thonakathe ul iillet iokat jakin, ana ul wakkamakathe kurekkurek nolon ilakin thokkettethe. ¹⁴ Ittina thio ana thothirin thorrettakathe irok tothik. Tok tothik then tokat, thio ithe'ra. ¹⁵ Ana okkwi ipak'ran kakinnicat iatham wothikkoik, ana kwarrettat irok tothik.

21

Tothi'rot iie ana nocapu iie

¹ Ittina mpimmakathe tothi'rot iie ana nocapu iie, akka tothi'rot torokit ana nocapu corokit thintatheik, ana tok irapangka acakuruk tellat. ² Mpimmakathe pothok ipie ipupupure poUruccelim apuo ntan ntothi'rot noKapik pokuccettatheik ere i're ittat ana worrongkiettanthet olle. ³ Ana mpocikathe po're cittan noprruk api're itti, “Nokkwo kunu ncik, man moKapik maik iul wung, kikkoik okin aththungon ana okin thaka ul wung ana Kapik ngka kung kaka nakin ana oka Kapik ken. ⁴ Kukukkot kin ngeme ntoca. Thio thellaik ana themeru ana thoo ana thok'rellako thoka, akka a'rupu iipe wellaik p'rin.”

⁵ Okkwi ipokat cik akwikkoik noprruk poili i'rekat itti, “Mpaik pakkot lon ncik appik lie.” Kwi'rekathin itti, “Okurri elli, akka lon ila mpaik perenung laik icat ana lonu itti lanekkettat cikit nan.”

⁶ Kwi'rekathin itti, “Mpokkothe lon ncik appik p'rin. Oun Alppa ana Omeka, ponothon ana ipocothe okkwi

ipaku're a'rupu ncik ana ipacothot a'rupu. Mpe-thet okkwion itha pica pokkwothe ng'ri ngomaku'rang mothikkoik akin ikko nuthuk. ⁷ Okkwion ithalkothe lon ilokithak, okin thapakkot nolon ana a'rupu enni appik ana mpaka Kapik ken ana okin thaka nyukul nyin. ⁸ Anaruk ul ionat n're ana iakannocokot lon nomikit ana iakkot lon ilokithak ana iangwo ul ana ia'ro nul nuthuk ana ia'rthuththo ul ana iakkot thamit ana ia'rane a'ran nga'rama ana ul ionu karra warrettat irok tothik iraik tacco nthik thalparut. Thio enthi ithe'ra.”

⁹ Ana u'rupa wothothilettat woKapik wulukku nti iu'rupa ie're'rapuruk ionat maththak ime're'rapuruk imoppappathe llon lotho'rarot cik ile're'rapuruk ilo-cothothe akkakat ai'rekathin itti, “Omakothin ana mpak-eneng ukul iathoka pari pothungkat.” ¹⁰ Ana Kanang kokakathe naun akonekathin no'ra woco'rong cittik ana cukwit ana kwokenekathin pothok ipupupure poUruc-celim apaanthan ntothi'rot noKapik. ¹¹ Thrik thoKapik thokorronnot ka'ran akollio ana kikkatheik akollio ere mothok imallio ionu cekerek crik ana po'rillir ere ng'ri. ¹² Ponat kunthong koku'rotherit kukwit ana krik ana konat athat attul ana ikken ke'ra ana u'rupa wothothilet-tat woKapik attul ana ikken ke'ra wokat angwot. Ana 'ran woul mothok mothok woIccereil iattul ana ikken ke'ra wokat wokurrakot nothat. ¹³ Athat wokat w'rapuruk na cingki ummot ngngin ana thokkun wothokure amma akatha na acingki ummot ngngin ana thokkun wothothari amma akatha na acingki ummot ngngin ana na acingki orungko. ¹⁴ Kunthong konoka'ran konat millang attul ana ikken ke'ra, ana 'ran woul wothothilettat wothungkat wokat wokurrakot nan.

¹⁵ U'rupa wothothilettat woKapik ierenin wonat kupir kothennekke cik ngngin ikokkattathe nothaap akwen-nekke ka'ran ngngin ana athat ana arrang. ¹⁶ Ka'ran konat

mipit marppithat amumoco'rin. Kwennekkethe ka'ran ngkupir kothennekke ana kwaththiat aka'ran karppithat nomipit appik ana kokat kittik, ka'ran koKapik na akikkoik nul wung. ¹⁷ Au'rupa wothothilettat woKapik ennekket kunthong ana waththiat itti kokat miththir arrial w'rapuruk (60) thape then nthennekke thopul iponyi. ¹⁸ Kunthong kokat kokkuttathe nomothok imallio imonu cekerek crik, ana ka'ran kokat kokkattathe nothaap ana pokat po'rillir ere nga'ra. ¹⁹ Millang moka'ran mokat mothukkakot mmothok imallio ana monat cekerek crik.

Cillang corokit conat k'ran itti Caccepper ana cokat co're ana cicci.

Cillang ice'ra conat k'ran itti Cappir ana caungkot conyi.

Cillang ic'rapuruk conat k'ran itti Akat ana cokat cipuk ana cothlo.

Cillang icoco'rin conat k'ran itti Emerlat ana cokat cicci.

²⁰ Ana cillang icukuluk conat k'ran itti Onyokic ana cokat coiththa ana upukat cik.

Cillang ic'rakkuruk conat k'ran itti Karnelian ana cokat co're.

Cillang ice're'rapuruk conat k'ran itti Criccolaith ana cokat cicci ere kuththukuththu.

Cillang icamoromor conat k'ran itti Perol ana cokat cicci ere taco tocukku.

Cillang icukullaco'rin conat k'ran itti Thopac ana cokat cicci ere kuththukuththu.

Cillang icattul conat k'ran itti Kriccoprac ana cokat cicci ere taco tocukku.

Cillang icattul ana ikken culukku conat k'ran itti Cacinth ana cokat conyi.

Cillang icattul ana ikken ke'ra conat k'ran itti Ameththic ana cokat cothlo ere maa.

²¹ Ana athat iattul ana ikken ke'ra wokat muccu morirok imallio imonu cekerek criik, athat appik wokkattathe na'raccak iallio worirok. Ana kathar ikririk koricarak coman kokkattathe nothaap ere nga'ra.

²² Mpakinnimma tupan toKapik noka'ran ken akka Ili Kapik ikakannalkakot ana thungkat okin tharupan ta'rama. ²³ Ana ka'ran kakannangkot cingki ana kakanangkot manna kwanok itti kaccie cik akka thririk thoKapik thothakkat k'ran ana thungkat thothakkat k'ran ikaccie cik konoka'ran. ²⁴ Ul wonomothok appik wanyaro noka'ran ken ngk'ran ken ana nili nonomo'rong nanane ka'ran tha'rthan then. ²⁵ Ana athat wonoka'ran wakanunukkakot aththik akka ngko'ra ngella nan. ²⁶ Ana ul wonomothok appik wana tha'rthan ana thririk then appik noka'ran ken. ²⁷ Papella ipakorronno oka pupupure pi'riko noka'ran, ana manna okkwi ipakkot lon ilokithak ana manna ammikkot anaruk okin thuluk itha 'ran wen wokurrakot iatham wothikkoik wothungkat.

22

Tue tothikkoik

¹ Ittina u'rupa wothothilettat woKapik wokenekathin tue ironu ng'ri tit ngothikkoik, ngo'rillir ere nga'ra allo noprrok poKapik ana pothungkat ² allot nocapu itho'rkit thokathar ikririk konoka'ran. Pira pothikkoik pokat nomarkan morue appummothe apokwono nyukul nyen attul ana ikken ke'ra amma kwanok kiot. Ana natha nopira pen nokat cik anittiet ul wonomothok appik iongo. ³ Thattatta thella p'rin. Prrok ipulukku poKapik ana pothungkat pakaik noka'ran koUruccelim ana ul iarekinok wa'ranok nga'rama. ⁴ Okin thimmak toca ana k'ran kung kakurrako nomuthu men. ⁵ Ana ngko'ra ngella p'rin. Okin thakannangkot k'ran kopapu ipacceik ana

manna k'ran kocingki, akka Ili Kapik wethet kin k'ran. Ana okin thakkma thupuththuput. ⁶ U'rupa wothothiletat woKapik wi'rekathin itti, "A'rupu ia ngkwimmat ana occikot waik icat ana wonu itti wanekkettat cikit nan. Ili Kapik iangwot ul wothernte lon loKapik wothiothe u'rupa wothothilettat wung athokene ul iarekinok lon ilaik lanthan accokkot noma'ri emmi."

Oieccuo paik pao

⁷ "Nokkwo kunu ncik, mpaik panthan noma'ri motte. Okkwi ipo'rumot nolon ilerettathe iatham enni kwethietta."

⁸ Oun oluanna ipocikotho ana imma lon elli appik. Anakka mpocikotho ana imma lon elli appik mpapathe iracok tou'rupa wothothilettat woKapik ee ungku ncik iokenerit a'rupu wen ana'rane nga'rama. ⁹ Anaruk kwi'rekathin itti, "Kirrnni okkot ittina, mpaik parekine Kapik ammakka oung ana opangkangon ul wothernte lon loKpaik ana ul io'rumot nolon ilokurrakot iatham enni. A'ranet Kapik nga'rama."

¹⁰ Ittina u'rupa wothothilettat wi'rekathin itti, "Kirrnni amu'rutto lon lotherente loul ierente lon loKapik ilaik iatham enni, akka ma'ri makko napuththut. ¹¹ Okkwi ipie ul ka kongo akwo'rungkot nan iie ul ka kongo ana okkwi ipokat akwo'rungekot lon ilokithak akwo'rungkot nan okkot lon ilokithak ana okkwi ipokat akwo'rungekot lon loporot akwo'rungkot nan okkot lon loporot ana okkwi ipaik pupupure akwo'rungkot pupupure."

¹² "Nokkwo kunu ncik, mpaik panthan noma'ri motte, anathokke ul appik kurekkurek nti ire ia akin thokkothe.

¹³ Oun Alppa ana Omeke, ponothon ana ipocotho, okkwi ipaku're a'rupu ncik ana ipacothot a'rupu."

¹⁴ Thethietta thaka nakkwion ithimet eret wen othakka itti akin ona itti okin thaeo ipira pothikkoik ana

akin okko ithat akin eo noka'ran koUruccelim. ¹⁵ Ana okkwion ithaik thapat nti icarak coman thokithak, okin itha'rthuththaro ana okkot thamit ana okin itha'ro nul nuthuk ana okin ithangwo ul ana okin itha'rane 'ran nga'rama ana okkwion ithongothe karra ana ammikkot.

¹⁶ “Oun oIeccuo akkothiothe u'rupa wothothilettat woKapik win atherenenon lon elli na'ran woul ioccoothe lon loleccuo. Oun Core ana thiki thoThauth, ana Cothot cothapa thorrot icallio.”

¹⁷ Kanang ana ul wung thi'ret itti, “A'rik.” Ana okkwi ipocckithe elli akwi're itti, “A'rik.” Okkwi ipapica okkwot akwanthan, ana okkwi ipongothe itti kwikko noi'ri ngothikkoik nuthuk.

¹⁸ Mpi'ret ul appik lon lonthomat iaik waccikot lon lotherente lon loKapik enni itti okkwi iparttothe lon lotte no'ron elli, Kapik karttot nolon lotho'rarot cik ilerettathe iatham enni. ¹⁹ Ana amma okkwi ipommothothe lon cik nti iatham enni wotherente lon loKapik, Kapik kanekothok thoka thung ipira pothikkoik ana thothikkoik thoricarak coman icupupure,* icerettathe iatham enni. ²⁰ Okkwi ipimmat lon elli ngkit pi'ret itti, “Amin. Mpaik panthan accokkot.”

ÿi, aloka icat. A'rik, Ili oIeccuo.

²¹ Athoporot thoIli oIeccuo oka noul woKapik. Amin.

Lumun
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 8 Feb 2022

b9cb69ce-3694-5d9f-bda5-4a2243fae000